

敘說心地法門品之由：〈梵網經盧舍那佛說菩薩心地戒品〉第十卷上 (T24,p.997)

《梵網經合註》卷1：「入文爲三。從品初至光爲何等相，有九行經，爲放光發起分。從爾時釋迦擊接大衆，至下卷心心頂戴歡喜受持，爲正示法門分。從爾時釋迦牟尼佛說上蓮華臺藏至卷終，有八行經十四行偈，爲流通益世分。雖是六十二品中之一品，序及流通，自在全經。而就茲一品，三分宛然。」

甲二、入文爲三（放光發起分、正示法門分、流通益世分）

乙一、放光發起

丙一、總標法會時處

丁一、明時處主伴

丁二、指所說法門

丙二、釋迦放光警衆

丙三、菩薩放光集問

乙二、正示法門

丙一、舍那說心地法

丁一、問答標名

戊一、釋迦騰問

己一、攝衆見本

己二、爲衆請法

戊二、舍那垂答

己一、以定示答

己二、誠聽言答

庚一、誠修三慧

庚二、委答所問

辛一、總答因果本迹

壬一、明因

壬二、明果

壬三、從本垂迹

壬四、攝迹歸本

辛二、廣示心地名相

壬一、正列四十法門

壬二、結示得入果相

癸一、以自身證

癸二、轉授衆生

丁二、正說義趣

戊一、菩薩問義

戊二、舍那詳答（明十發趣、明十長養、明十金剛心、明十地）

※說明：科文錄自蕩益大師《梵網經合註》。

甲二、入文爲三

乙一、放光發起

丙一、總標法會時處

丁一、明時處主伴

爾時釋迦牟尼佛，在第四禪地中，摩醯首羅天王宮。與無量大梵天王，不可說不可說菩薩衆。

丁二、指所說法門

說蓮華臺藏世界，盧舍那佛所說心地法門品。

丙二、釋迦放光警衆

是時釋迦身放慧光，所照從此天王宮乃至蓮華臺藏世界。其中一切世界，一切衆生，各各相視歡喜快樂，而未能知此光，光何因何緣？皆生疑念；無量天人亦生疑念。

丙三、菩薩放光集問

爾時衆中玄通華光主菩薩，從大莊嚴華光明三昧起，以佛神力放金剛白雲色光，光照一切世界。是中一切菩薩，皆來集會，與共同心異口問此光，光爲何等相？

乙二、正示法門

丙一、舍那說心地法

丁一、問答標名。

戊一、釋迦騰問

己一、攝衆見本

是時釋迦即擎接此世界大衆，還至蓮華臺藏世界，百萬億紫金剛光明宮中，見盧舍那佛，坐百萬億蓮華赫赫光明座上。時釋迦佛及諸大衆，一時禮敬盧舍那佛足下已。

己二、爲衆請法

釋迦佛言：「此世界中，地及虛空一切衆生，爲何因緣得成菩薩十地道？當成佛果爲何等相？」如〈佛性本源品〉中，廣問一切菩薩種子。

戊二、舍那垂答

己一、以定示答

爾時盧舍那佛，即大歡喜，現虛空光體性，本源成佛常住法身三昧，示諸大衆。

己二、誠聽言答

庚一、誠修三慧

是諸佛子！諦聽，善思修行。

庚二、委答所問

辛一、總答因果本迹

壬一、明因

我已百阿僧祇劫修行心地，以之爲因。

壬二、明果

初捨凡夫，成等正覺，號爲盧舍那，住蓮華臺藏世界海。

壬三、從本垂迹

其臺周遍有千葉，一葉一世界爲千世界，我化爲千釋迦，據千世界。後就一葉世界，復有百億須彌山、百億日月、百億四天下、百億南閻浮提、百億菩薩釋迦，坐百億菩提樹下，各說汝所問菩提薩埵心地。其餘九百九十九釋迦，各各現千百億釋迦，亦復如是。

壬四、攝迹歸本

千葉上佛是吾化身，千百億釋迦是千釋迦化身。吾以爲本源，名爲盧舍那佛。

辛二、廣示心地名相

壬一、正列四十法門

爾時蓮華臺藏世界盧舍那佛，廣答告千釋迦千百億釋迦所問心地法品：諸佛當知，堅信忍中十發趣心向果：一捨心、二戒心、三忍心、四進心、五定心、六慧心、七願心、八護心、九喜心、十頂心。諸佛當知，從是十發趣心入堅法忍中，十長養心向果：一慈心、二悲心、三喜心、四捨心、五施心、六好語心、七益心、八同心、九定心、十慧心。諸佛當知，從是十長養心入堅修忍中，十金剛心向果：一信心、二念心、三迴向心、四達心、五直心、六不退心、七大乘心、八無相心、九慧心、十不壞心。諸佛當知，從是十金剛心入堅聖忍中，十地向果：一體性平等地、二體性善慧地、三體性光明地、四體性爾焰地、五體性慧照地、六體性華光地、七體性滿足地、八體性佛吼地、九體性華嚴地、十體性入佛界地。

壬二、結示得入果相

癸一、以自身證

是四十法門品，我先爲菩薩時，修入佛果之根源。

癸二、轉授衆生

如是一切衆生，入發趣、長養、金剛、十地，證當成果，無爲無相大滿常住，十力、十八不共行，法身智身滿足。